

Seken Korin Nægkiariien sə rani mə nəfe i nəkukuə

Pol rımərai nəkukuə i kani mə Seken Korin. In ruvərai raka Fas Korin məkwə nepwın həukurau nənə in rırai mwi sə i mərhi pen i revən. Nakalasia me fwe Korin kamheitehieitehi ihi kusen səvənraha, mamho ihi noien ərəha me. Pol revən fwe Korin mətə rarə ouihi a ti nəri nə mə irəha həpkrərig mhə ia noien ərəha me səvənraha. Nənə nəkur əfwaki me nepwın həpkini mhə nıpərhiendien ia Pol mə in aposol pərhiien riti səvəi Kumwesən. Nəpın Pol rəpwəh irəha mevən fwe profens Masetonia, in rerin ragien pik nəpın Taetas ruvehi nəgkiariien amasan muvehe mə nakalasia me fwe Korin hənətə sas ia noien ərəha me səvənraha nənə mhərərīg ia noien ərəha me səvənraha. Nəpın Pol rıregi nəgkiariien nəha, in rırai nəkukuə sə ro kəru irə revən ti nəkur Korin. Ia nıpəri nəkukuə i sə rakupwən Pol rini pen ti nəkur Korin mə rerin ragien ti nəri nə mə irəha hənəpwəh noien ərəha me səvənraha mamho noien amasan sə Kumwesən rokeikei. Ia nıpəri nəkukuə sə rakurirə Pol raməgkiari atukw a ia in mine nərmama səməme kamhəmwəki in mamhəni ərəha in.

¹ Iou Pol. Iou aposol riti səvəi Iesu Kristo, ti nəri nə mə Kumwesən rıməni nəkwan mə tako, mine piəvtaha Timoti.

Nəkukuə i rauvehe tukumiaha nakalasia me səvəi Kumwesən fwe taon nəha Korin, mine nərmama me pam səvəi Kumwesən fwe profens nəha Akaea.

² Pwəh Kumwesən Tata səkitaha, mine Iesu Kristo Iərimənu səkitaha, krouəriari pehe namasanien mine nəməriniuen m kımiaha.

Kumwesən sə in nukune noien səvəi nasituien

³ Pwəh səgnəgini Kumwesən i in Kumwesən mine Tata səvəi Iərimənu səkitaha Iesu Kristo, in Tata sə in nukune napiien, nənə in Kumwesən sə in nukune noien səvəi nasituien me pam.

⁴ In ramasitu ia kımaha ia nəmisəien me pam səkimaha, mə kımaha iahəukurən nasituien ia nərmama ia nəmisəien me səpəmsəpə səməme irəha haməregi. Nənə kımaha tahasitu ia nirəha ia noien səvəi nasituien sə Kumwesən rino m kımaha.

⁵ Rəmwhen a ia nəmisəien sə Kristo rıməuvehi, nəmisəien nəha rauvehe pik mwi ia nimiruien səkimaha. Ia noien a mwi nəha, ti nəri nə mə kımaha iahaməuvehe mho kuatia kımaha Kristo, Kumwesən ramasitu pik ia kımaha, nənə noien nəha ramevən mwi ti nərmama nepwın.

⁶ Trini minuə kımaha iahamregi nəmisəien, mətə in nə trasitu ia kımiaha muvehimiru kımiaha. Trini minuə Kumwesən rasitu ia kımaha ramo mə kımaha iahəukurən nasituien ia kımiaha. Nənə kwənkwai nasituien nəha raukuə ia nimiruien səkimiaha, nənə nəpın hiarə ia nəmisəien kuatia a tsarə irə trasitu ia kımiaha mə tihərer əknekın ia nəpın me.

⁷ Kimaha iahənəmri pen əknekin nətərigien səkimaha ia Kumwesən tukumiaha mə tihərer əknekin. Ro iamınhi irə ti nəri nə mə kitaha pam samarə ia narəien kuatia a mə kimiaha tihəregi nəmisəien sə iahamarə irə, nənə ia noien a mwi nəha Kumwesən trasitu ia kimiaha rəmwhen ramasitu ia kimaha.

⁸ Piak me, kimaha iahokeikei mə tihəukurən amasan nəpın sikai sə iahənarə irə ia profens nəha Esia. Nəpın nəha riskai pik tukumaha, mo rerimaha rırhi mə ko iahəpkimıru mhə mamhəuvən.

⁹ Kimaha iahamregi rəmwhen kinəkiri raka kimaha mə tahemhə. Mətə narimnari me nəha haməuvehe mə kimaha tahəpwəh nətigiteien ia niskaiien atukw səkimaha, mətə tahətigite ia Kumwesən sə ramo nərmama hemhə hətui mwi.

¹⁰ Ia nəpın nəha ipaka kimaha iahemhə, mətə in rıməvehimıru kimaha. Nənə in trauehimıru kimaha iamınhi irə mamevən. Iahənəmri pen əknekin nətərigien səkimaha irə mə in truehimıru mwi kimaha.

¹¹ Mətə kimiaha tihaməkeikei mhasitu ia kimaha mhəfwaki tukumaha. Tiho iamınha irə mə nərmama həpik tuhəni tanak m Kumwesən ti narimnari amasan me səməme in tro m kimaha ti nəri nə mə nərmama həpik hənəfwaki tukumaha.

Pol rərari ia nətərigien səvənhi mine nəfe tro

¹² Nari riti kimaha iahaməgkiari ərpwi irə. Kimaha iahamregi fwe ia rerimaha mə ro nıpərhienien. In i mə noien səkimaha ia təkure tıprənə iahəno m nərmama nepwın, mhəno mwi m

kimiaha rəpi raka, in noien sə raməmak irapw ia kwopun ukuraan. Iahaməni a nəgkiariien pərhiēn rəmwhēn sə Kumwēsən rokeikei. Iahəpkəgkiari mhə ia nukurəniēn səkimaha səvəi tīprənə, mətə iahaməgkiari ia namasaniēn səvəi Kumwēsən.

13-14 Iakani iamīnhi irə ti nəri nə mə iahəpkrai mhə nəgkiariien riti sə rīskai tukumiaha ti nəvsiniēn, uə ti nukurəniēn nīpwrān. Təkwətəkwuni hiəuvəukurən nətəriēn səkimaha kwopti, mətə iakokeikei pīk mə nəpīn riti tihəukurən pam. Nənə ia noien nəha, nəpīn Iesu Iərimənu səkitaha truvehē mwi, kimiaha tihagiēn tukumaha rəmwhēn a mwi mə kimaha iahamagiēn tukumiaha.

15-16 Ti nəri nə mə iakukurən mə hiamagiēn tukumaha, nətəriēn kupwən səiou mə takevən fwe profens nəha Masetonia, mukupwən muvehē mətōni kimiaha, nənə nəpīn takrəriēg takuvehē mwi mətōni kimiaha. Ro pen tihəuvehi namasaniēn m kəru, nənə kurirə irə tihāsitu ia nirak ia suatuk səiou ti nevəniēn fwe ia tənə Jutia.

17 Mətə iakinəpwəh. Ro pen rosi rerimiaha rīrhi mə nəpīn iakamətəriēg mə tako iamīnha irə nətəriēn səiou ramaiuaiu? Uə rosi iakəmwhēn a ia nərmama nepwīn səvəi tīprənə kamhəni nəgkiariien mi nəha “Ouəh” mīne “Rekəm” ia nəgkiariien kuatia a?

18 Kimiaha hiəukurən mə Kumwēsən ramo nəgkiariien səvənhi ia nəpīn me. Nənə kimaha mwi nəgkiariien səkimaha tukumiaha rīpko mhə “Ouəh” mīne “Rekəm.”

¹⁹ Iakani iaminihi irə ti nəri nə mə Tini Kumwesən i Iesu Kristo sə iahamarəvisau irapw tukumiaha kimrahar Saelas mine Timoti, ripko mhə “Ouəh” mine “Rekəm,” mətə ia Kristo, nəpin me pam nəgkiariien səkimaha in nə “Ouəh.”

²⁰ Iakani iaminihi irə ti nəri nə mə promes me pam səvəi Kumwesən həuvehe mho nipərhiendien i ia Iesu Kristo. Kitaha səuvəuvehe mhəno kuatia kitaha min, ro pen səukurən ninien “Ouəh” ti nuvehi utəien nəghi Kumwesən.

²¹ Kumwesən a ramo kimaha iahamərer əknekin ia Kristo kitaha m kimiaha. In rimərfi kitaha,

²² məmri Nənimwin səvənhi ia reritaha rahatən pen mə kitaha nərmama me səvənhi. Ti nəri nə mə Nənimwin nəha ramarə ia reritaha, nənə, kitaha səukurən amasan mə Kumwesən truvei pehe pam narimnari amasan me səməme rinəmri karen mə səkitaha.

²³ Təkwtəkwuni iakaməkwein Kumwesən mə triregi nəgkiariien i səiou. Trini minuə iapkini mhə nipərhiendien, pwəh in rərpwin noien ərəha səiou. Iou iakinapkuvehe mhə fwe Korin ti nəri nə mə iapkokeikei mhə mə takini nəgkiariien sikai riti tukumiaha.

²⁴ Kimaha iahəpwəh nokeikeiien mə tahərimənu ia nahatətəien səkimiaha, rekəm. Mətə taho wok kitaha m kimiaha ti nagienien səkimiaha, ti nəri nə mə hiənərer əknekin raka ia nahatətəien səkimiaha.

2

¹ Ro pen iakuvəni raka ia rerik mə ko iapkuvehe

1:19: Wok Me 18:5 **1:20:** Rev 3:14 **1:22:** 1Jon 2:27, Efes 1:13-14, 2Kor 5:5, Rom 8:16-17 **1:23:** Rom 1:9, 2Kor 11:31 **1:24:** 1Tes 5:3 **2:1:** 1Kor 4:21, 2Kor 12:21

mhə mwi mətoni kɨmiaha mo rerɨmiaha rəmisə.

² Iakani iamɨnhi irə ti nəri nə mə kɨmiaha a hiamo rerɨk ramagien, mətə trɨni mɨnuə iako rerɨmiaha rəmisə, nənə iərmama riti riwən sə tro rerɨk ragien.

³ Nənə iakimərai nəkukuə nəha mə nəpɨn iakuvehe mətoni kɨmiaha tapkregi mhə rerɨk rəmisə. Iakəpwəh nokeikeien mə nərmama səməme tuhaməkeikei mhə rerɨk ragien, tuho rerɨk rəmisə. Iou iakuvəukurən raka mə kitaha kuatia a, nənə nəpɨn rerɨk ragien, kɨmiaha mwi rerɨmiaha tragien.

⁴ Ro pen nəpɨn iakimərai nəkukuə nəha m kɨmiaha rerɨk rəmisə pik tukumiaha, mərkwəpɨr, nise nənimek raiu tukumiaha. Iapkraihə mhə nəkukuə nəha mə tro rerɨmiaha rəmisə, mətə iakimərai mə tihəukurən nokeikeien i səiou rasori tukumiaha.

Nakalasia me fwe Korin tuhaməkeikei mhenouenou noien ərəha sə iərmama nəha rino

⁵ Mətə iərmama nəha rino noien ərəha, in rɨpko mhə rerɨk rəmisə, mətə rino mə kɨmiaha pam rerɨmiaha rəmisə kwopti. Iakani nəgkiariien i məpwəh nokeikeien mə triskai pik ti iərmama nəha,

⁶ ti nəri nə mə nərpwɨnien nəha kɨmiaha hiəpik hiəno min ti noien ərəha səvənhi rɨnəmwhen raka.

⁷ Təkwtəkwwuni nəha tihaməkeikei mhenouenou noien ərəha səvənhi nənə mhomasan rerɨn, mə rerɨn trəpwəh nəmisə pikien muvehi irəpw nətərigien səvənhi.

⁸ Iakaməres kɨmiaha mə tiho pwəh in rukurən nokeikeien səkɨmiaha tukwe.

⁹ Iakani iam̄inhi irə ti nəri nə mə in nə nəri iakimərai nəkukuə nəha tukwe, mə takətoni ro k̄imiahaha mə tiho nəkwaak ia narimnari me pam uə rekəm.

¹⁰ Tr̄ini minuə hiənenouenou noien ərəha səvəi iərmama riti, iou mwi takenouenou irə. Tr̄ini minuə iərmama nəha rino nəri ərəha me nepw̄in mə iou takaməkeikei menouenou noien səvənhi, mətə iou iakinenouenou raka noien səvənhi ia nəmri Kristo ti nasituien ia k̄imiahaha.

¹¹ Iakamo noien nəha kamo Setan rouraha kitaha ia neikuəien me səvənhi. Iakani iam̄inhi ti nəri nə mə kitaha səuvəukurən raka nətərigien me səvənhi səməme in ramesi pen.

Kumwesən ramo nərmama kamhəukurən Kristo ia aposol me səvənhi

¹² Nəp̄in iakevən fwe ia taon nəha Troas mə takəvisau irapw nəgkariien amasan səvəi Kristo, iakətoni mə Iərimənu səkitaha rinəsevər ia təpinhə miou mə tako wok fwe ik̄in.

¹³ Mətə iakamətərig pik m̄ipkarwis mhə, ti nəri nə mə iap̄kətoni mhə piak Taetas ia kwopun nəha. Nənə iakəsək̄ir m̄inraha mier mevən fwe ia profens nəha Masetonia.

¹⁴ Mətə iakaməgnəḡini Kumwesən ti nəri nə mə ia nəp̄in me in ramiri k̄imaha ia Kristo, mamō k̄imaha iahəmwhen ia nərmama me i kamhəkurirə ia kig riti sə rinaruagən pam, mamrərig pen fwe imwəni. Ia nəp̄in me Kumwesən ramo nukurənien ia Kristo rauku pen ia k̄imaha mamevən ia kwopun me. Nərmama

kamhæregi nukurænien næha ræmwhen ia nari riti kamregi nipekîn.

¹⁵ Iakani iamînhi iræ ti næri næ mæ kimaha iahæmwhen ia nimwækmwæki nari nipekîn rapein amasan Kristo rauvani ti nægnæginien Kumwesæn nise napw iræ ramevæn ti nærmama sæmæme Kumwesæn rauvehimîru iræha, mamevæn mwi ti sæmæme kamhæuvæn mæ tuhemhæ.

¹⁶ Sæmæme kamhæuvæn mæ tuhemhæ hæregi kimaha iahæmwhen ia nipekti nise napw næha sæ rauku pen ia nemhæien mamevæn ti nemhæien. Sæmæme Kumwesæn rauvehimîru iræha hæregi kimaha iahæmwhen ia nise napw næha sæ rauku pen ia nimîruien mamevæn ti nimîruien. Wok næha wok asori. Sin rukuræn noien?

¹⁷ Kimaha iahæpkæmwhen mhæ ia nærmama me næha hæpik kamhæni irapw nægkiariien sævæi Kumwesæn ti nuvehien a mane, rekæm. Mætæ Kumwesæn rinærhi pehe kimaha. Ia Kristo kimaha iahamæni irapw nægkiariien amasan sævænhi ia næmri Kumwesæn, nænæ nægkiariien sækimaha rauku pen a ia rerimaha sæ ratukwatukw.

3

Nækukuæ riti kimærai rani sas ia Pol mine in me nepwin

¹ Rosi rerimiahaha rîrhi mæ iahænamæfiætæ mwi kimaha ia næmrîmiahaha, mætæ rîpkko mhæ iamînhi iræ. Næpîn nærmama pwispwis me hæuvehe imwæmiahaha, tuhamækeikei mhæuvehi nækukuæ riti kimiahaha me nepwin hæmærai ti nîni irapwien iræha

tukumiaha, ti nəri nə mə hiəreirei irəha. Nənə nəpɪn həier mhəpwəh kımiaha, tuhaməkeikei mhəuvehi nəkukuə səkimiaha ti noien kımiaha me nepwɪn həukurən irəha. Kımiaha hiənuə tiho iamɪnhi irə ia kımaha? Rekəm!

² Kımiaha atukwatukw hiəmwhen ia nəkukuə səkimaha rani sas ia kımaha. Nəkukuə nəha kımərai pen ia rerimaha, nərmama pam tuhəvsini mhəukurən.

³ Ro nukurənien i tukunraha hətoni mə Kristo əpa rımərai nəkukuə nəha, məmri pehe ia rəgimaha mə tahərhi pen i ramevən. In rɪpkrai mhə nəkukuə nəha ia nəri kamrai nari irə, mətə rımərai nəkukuə nəha ia Nənɪmwɪn i in səvəi Kumwesən sə ramɪru. Nənə rɪpkrai pen mhə ia kəruətərei sə rɪpwɪəpwɪə, mətə rımərai pen ia reri nərmama.

⁴ Kımaha iahəpkehekɪr mhə mə tahəni iamɪnhi irə, ti nəri nə mə kımaha iahəuvəuvehe mhəno kuatia kımaha Kristo, nənə mamhahatətə əknekɪn ia Kumwesən.

⁵ Kımaha iahəmwhen ti noien wok i, mətə ko iahəpkɪni mhə mə nari riti rauku pehe atukw a tukumaha. Kımaha iahəmwhen ti nəri nə mə Kumwesən ramasitu ia kımaha.

⁶ In rɪno kımaha iahənəmwhen ti noien wok kımaha iotukwɪnɪnari me səvəi nəgkiariien vi səvənhi sə in rɪnərihi tərini əknekɪn. Nəgkiariien vi nəha rɪpkuku pen mhə ia Loa sə kımərai, mətə rıməuku pen ia Nənɪmwɪn səvəi Kumwesən. Iakani iamɪnhi irə ti nəri nə mə Loa sə kımərai ramousi əpune iərmama, mətə Nənɪmwɪn səvəi Kumwesən rauvei pehe nɪmɪruien.

Nægkiariien vi kinərihi tərini əknekın ramser pik anan rınəpi raka Loa

⁷ Fwe kupwən, nəpın Loa sə kimərai pen ia kəruətərei kəru rıməuvehe vi a, rıməuvehe irau nukuraanien səvəi Kumwesən. Nukuraanien nəha rəhiəpwın nənime Moses ramser pik. Nəkur Isrel ko həpkəti əter pen mhə ia nənime Moses, nəri auər a mə nukuraanien nəha ia nənimen rinameiwaiu. Noien səvəi Loa nəha ramo mə iərmama remhə, mətə rıməuvehe irau nukuraanien səvəi Kumwesən.

⁸ Mə ro iamınhi irə rəfo ia noien səvəi Nənimwın Ikinan? Tukətoni nukuraanien səvəi Kumwesən irə ramser pik məpi raka.

⁹ Nægkiariien akuas səvəi Loa sə raməkiri nərmama mə tuhaməkeikei mhemhə kamətə nukuraanien səvəi Kumwesən irə ramser, mətə mə ro iamınhi irə nəgkiariien vi kinərihi tərini əknekın sə ramo nərmama hatukwatukw ia nəmri Kumwesən, tukətoni mwi nukuraanien səvəi Kumwesən irə ramser pik məpi raka.

¹⁰ Nipərhiəniən, nəgkiariien akuas səvəi Loa sə kamətoni nukuraanien səvəi Kumwesən irə, təkwtəkwuni nəha kəpwəh nətoniən nukuraanien nəha irə, ti nəri nə mə nəgkiariien vi kinərihi tərini əknekın ramser pik anan rınəpi raka Loa nəha.

¹¹ Nægkiariien akuas səvəi Loa rıməuvehe irau nukuraanien səvəi Kumwesən, mətə triwən mwi rəmwhen ia nukuraanien sə rıməser ia nəmri Moses. Mətə nəgkiariien vi Kumwesən rınərihi tərini əknekın trarə rerin, miser pik məpi raka.

3:7: Eks 34:30

3:8: Kal 3:2,5

3:9: Dut 27:26, Rom 1:17, 3:21

3:10: Eks 34:29

12 Ti nəri nə mə kımaha iahəukurən amasan nəri nəha mə ro iamınhi irə, ro pen kımaha iahamətigase,

13 mhəpkəmwhen mhə ia Moses. In rınousəman nənimen ia tınari əgeigei mə nəkur Isrel tuhəpwəh nətonien mə nukuraanien sə raməhiəpwın nənimen rınamiwən.

14 Mətə nətərigien səvəi nəkur Isrel me nəha fwe kupwən kınərəpinhə i. Nənə meste pehe nəha ipwet mine nəpın irəha həvsini nəgkiariien akuas səvəi Loa, irəha həpkregi sas mhə nəfe rani, ti nəri nə mə nari riti ramərəpinhə nətərigien səvənraha rəmwhen ia tınari əgeigei sə rınousəman nənime Moses. Mətə Kristo əpa rukurən nuvehi rakaien nəri nəha ia nətərigien səvəi iərmama nəpın iərmama ruvehe mo kuatia irau min.

15 Ouəh meste pehe nəha ipwet mine, nəpın həvsini Loa səvəi Moses, nari riti raməsısəg ia nətərigien səvənraha rəmwhen ia tınari əgeigei nəha sə rınousəman nənime Moses fwe kupwən.

16 Mətə trini minuə iərmama riti ruvsini in muvehe ti İərimənu səkitaha, tınari nəha trier raka.

17 İərimənu nəha səkitaha in Nənımwın İkinan. Nənə kwopun Nənımwın İkinan ramarə ikın, in rafi nari ia nərmama.

18 Kitaha pam i səpkuvegi mhə nəmritaha rəmwhen ia Moses, mətə nəmritaha ramser kamətə nukuraanien səvəi İərimənu ia kitaha. Ia nəpın me in rauvsini nımıruien səkitaha mə tsəuvehe mhəmwhen irə sarə ia nukuraanien riti mharə mhəuvən mwı ia riti. Noien i rauku pen ti İərimənu səkitaha in nə Nənımwın İkinan.

4

Kumwesən ruvei pen wok m aposol me

¹ Kumwesən rapi tukumaha nənə muvei pehe wok i m kimaha ro pen tahəpwəh nəpouien i.

² Kimaha iahəuvəuvei pen raka təkutamaha ia noien afafa me mine noien me səməme ho naurisien. Iahəpkavən mhə ia noien səvəi neikuəien, uə iahəpkuvsini mhə nəgkiariien səvəi Kumwesən, rekəm. Mətə kimaha iahaməni irapw nəgkiariien pərhiēn ia nəmri nərmama me pam mə irəha tuhəkiri noien səkimaha mhəukurən ia rerinraha mə kimaha iahamo noien atukwatukw ia nəmri Kumwesən.

³ Rosi nəgkiariien amasan sə iahaməni irapw ramərkwafə ti nərmama nepwīn, mətə ramərkwafə a ti nərmama səməme kamhəuvən mə tuhemhə.

⁴ Irəha ko həpkini mhə nīpərhiēnien ia nəgkiariien amasan nəha, ti nəri nə mə Setan i, iəremhə sə ramərimənu ia tiprənə i, rinousəman nətərigien səvənraha, mamo irəha həpwəh nətoniēn nukuraanien sə raməhiəpwīn irəha. Nukuraanien nəha rauku pen ia nəgkiariien amasan sə raməvisau nasoriēn səvəi Kristo. Kristo nəha in rəmwhen atukwatukw ia Kumwesən.

⁵ Kimaha iahəpkəvisau atukw mhə kimaha, mətə iahaməvisau Iesu Kristo mə in Iərimənu, nənə kimaha nərmama iahamo tukwini nari m kimiaha ia nəghi Iesu.

⁶ Ro iamīnhi irə ti nəri nə mə Kumwesən nəha riməni mə, “Pwəh nukuraanien ruək məhiəpwīn

4:1: 2Kor 3:6 **4:2:** 2Kor 2:17, 1Tes 2:5, 1Kor 1:18 **4:4:** Efes 2:2, Kol 1:15, Hip 1:3 **4:5:** 2Kor 1:24 **4:6:** Jen 1:3, Aes 9:2, 2Kor 3:18

kwopun rīpitəv ikin,” in raməhiapw ia rerimaha, mə kīmaha iahəukurən nətoniien nukuraanien səvəi Kumwesən, nənə iahətoni nukuraanien nəha ramser ia nənime Kristo.

Aposol me həpkiskai mhə ia niskaiien atukw səvənraha

⁷ Mətə kīmaha iahaməuvehi nəri amasan nəha ia nīpwramaha me i kino ia tīprənə həpkiskai mhə. Ro iamīnhi irə mə trahatən pen mə niskaiien amasan nəha rəpi raka rīməuku pen tī Kumwesən, rīpkuku pehe mhə tukumaha.

⁸ Ia nəpīn me kīmaha iahamregi rərəha ia narimnari me rīpik, mətə iahəpkimwei mhə. Nəpīn me nepwīn iahəreirei suatuk, mətə iahaməmwur mhəpwəh nəpwəhien.

⁹ Nərmama hamo nərəhaien m kīmaha, mətə Kumwesən rīpkəpwəh mhə kīmaha. Hamousi kīmaha, mətə həpkouraha mhə kīmaha.

¹⁰ Ia nəpīn me rəmwhen mə kīmaha iahaməuvehi nemhəien səvəi Iesu ia nīpwramaha, ro iamīnhi irə mə nərmama həukurən nətoniien mwī nīmīruien səvəi Iesu ia nīpwramaha.

¹¹ Iakani iamīnhi irə tī nəri nə mə kīmaha iahamarə, nəpīn me pam kauvei pen kīmaha mə tahemhə tī nəghī Iesu. Ro iamīnhi irə mə nərmama tuhətoni nīmīruien səvənhi ia nīpwramaha sə trīpkemhə ia nəpīn riti.

¹² Noien nəha nīpwran mə nemhəien ramowok ia kīmaha, mətə nīmīruien ramowok ia kīmīaha.

¹³ Nækukuə Ikinan rani mə, “Iakinahatətə ro pen iakani.” Ia noien kuation a səvəi nahatətəien kımaha mwi iahənahatətə ro pen iahaməni.

¹⁴ Kımaha iahəukurən amasan mə Kumwesən sə rino İərimənu səkitaha rətui mwi ia nemhəien, in tro kımaha mine kımiaha, kitaha pam sətui mwi ia nemhəien kitaha İesu, nənə mərpwi irapw kitaha ia nənimen.

¹⁵ Narimnari me i, kımaha iahamo ramasitu ia kımiaha mə nəpın namasanien səvəi Kumwesən rivi pehe nərmama həpik mwi həuvehe ti Kristo, nənə nərmama həpik mwi tuhəni tanak ti Kumwesən, mhəuvehi utə nəghin irənhə anan.

¹⁶ Narimnari me nəha ho kımaha iahəpwəh nəpouien i. Nəri auər a mə nıpwramaha iruə ramevən mə trərəha, mətə rerimaha fwe imwə Kumwesən ramo mə ramərməvi ia nəpın me.

¹⁷ Ro iamınhi irə ti nəri nə mə nəmisəien me i saməregi ia təkure tıprənə i irəha nəri auər a, həpkərə əpwəmwis mhə, mətə haməpnəpenə ia kitaha ti narəien rerin sə raməhiapw mamasan pik məpi raka.

¹⁸ Nənə ro iamınhi irə, nənimemaha həpkərəer pen mhə ia narimnari me kamətoni, mətə hamərəer pen ia narimnari me kıpəkətoni mhə. İakani iamınhi irə ti nəri nə mə narimnari me kamətoni irəha narimnari me səvəi təkwtəkwuni a, tuhəpkiwən, mətə narimnari me kıpəkətoni mhə irəha tuharə rerin.

5

Nipwrataha sə vi fwe ia neiai

¹ Iakani iam̄inhi irə ti nəri nə mə nipwrataha rəmwhen ia nimwə tapolen samarə irə səvəi nəp̄in ouihi a ia tiprənə i. Nənə kitaha səukurən mə tr̄ini minuə nipwrataha i ruvehe memhə mərəha, mətə fwe ia neiai nipwrataha vi fwe ikin sə rəmwhen ia nimwə riti ripko mhə iərmama r̄ino mətə Kumwesən a r̄ino nənə in trarə rerin.

² Nəp̄in samarə ia nipwrataha i, saməregi rərəha, mamhəvi kwakwa neiahagien tukwe, mamhokeikei anan mə tsəuvən mharə ia nimwə vi nəha fwe ia neiai.

³ Kitaha tsarkahu nipwrataha vi nəha rəmwhen ia karkahu, tipkətə mhə mə samavən auər a.

⁴ Nəp̄in samarə ihi ia nimwə tapolen i səkitaha ia tiprənə i, saməregi rərəha pik, mamhəvi neiahagien tukwe, mhəpwəh nokeikeien mə tukuvehi raka nipwrataha i rəmwhen ia karkahu. Mətə sokeikei mə tukarkahu pehe nipwrataha sə fwe ia neiai mə nipwrataha i sə ko ripkarə rerin mhə truvehe mərməvi marə rerin.

⁵ Kumwesən əpa r̄ino kitaha ti narimnari me nəha. In riməuvei pehe Nənimw̄in Ikinan m kitaha. Ti nəri nə mə Nənimw̄in nəha ramarə ia kitaha, nənə, kitaha səukurən amasan mə Kumwesən truvei pehe pam narimnari amasan me səməme r̄inəmri karen mə səkitaha.

⁶ Ro iam̄inhi irə kitaha samətigase ia nəp̄in me, mamhəukurən mə nəp̄in samo imwətaha ia nipwrataha i, səpkarə mhə fwe imwei Iərimənu.

⁷ Iakani iam̄inhi irə ti nəri nə mə kitaha samarə

5:1: 2Kor 4:7, 2Pit 1:13-14

5:2: Rom 8:23

5:4: 1Kor 15:53-54

5:5: Rom 8:16,23

5:6: Hip 11:13-16

5:7: 1Kor 13:12

ia nahatətəien, səpkarə mhə ia nəfe samətoni.

⁸ Kitaha samətigase mamhəregi mə ko səpwəh nīpwrataha i mhəuvən mho imwətaha fwe ia neiai kitaha Iərimənu səkitaha sə nəha ramasan pīk məpi raka.

⁹ Ro iamīnhi irə mīne nəri auər a mə samarə kitaha min uə səpkarə mhə kitaha min, mətə saməmwur mə rerin tragien tukutaha.

¹⁰ Iakani iamīnhi irə ti nəri nə mə kitaha pam tsaməkeikei mhərer kupwən ia nəmri Kristo mə in trəkiri noien me səkitaha. Kitaha kuatia kuatia tsəuvehi nərəkuien resi pen noien me səno ia narəien i samarə irə ia nīpwrataha i, noien amasan uə noien ərəha.

Kumwesən rino suatuk ia Kristo mə kitaha səukurən nuveheien mho in me nepwīn

¹¹ Nənə təkwtəkwuni kīmaha iahəuvəukurən amasan mamhəhekīr Iərimənu səkitaha. Ro pen iahaməmwur mə tahəvi pehe nərmama. Kumwesən rukurən amasan kīmaha. Rerik rirhi mə kīmīaha mwi hiəukurən amasan kīmaha.

¹² Kīmaha iahəpwəh nokeikeiien mə tahəuvehi utə kīmaha ia nənimemīaha, mətə tahəuvei pehe nətərigien səkīmaha mə rəfo rerimīaha tragien tukumaha. Nənə təkwtəkwuni hiəukurən nīrīpwenien nəgkiariien səvəi nərmama səməme hamərpwi irəha ti noien sə nərmama kamhətoni, mətə rerinraha rīpkrhi mhə nəri sə ramarə ia reri iərmama.

¹³ Trīni mīnuə rerimīaha rirhi mə iahamərməri, mətə kwa iahamo wok səvəi Kumwesən. Nənə trīni

mīnuə rerīmīaha rīrhi mə iahəukurən nari, mətə kwa iahamasitu ia kīmīaha.

¹⁴ Ro iamīnhi irə ti nəri nə mə nokeikeien səvəi Kristo ramərimənu ia kīmaha. Kīmaha iahəukurən amasan mə iərmama kuatia a rīmamhə ti nərmama pam, nənə ro pen rəmwhen mə nərmama me pam həuvamhə.

¹⁵ Nənə rīmamhə ti nərmama pam mə səməme kamhəmīru tuhəpwəh noien narimnari me səməme irəha a hokeikei, mətə irəha tuhaməkeikei mho noien me səməme Iesu rokeikei. In rīmamhə ti nīrəha, nənə mətui mwi ia nemhəien.

¹⁶ Ro pen ipwet mīne kīmaha iahəpkəkiri mhə nərmama ia noien sə nərmama səvəi tīprənə haməkiri nərmama irə. Nīpərhienien kīmaha iahənəkiri Kristo ia noien nəha ia nəpīn riti, mətə təkwtəkwuni iahəpkə mhə mwi.

¹⁷ Ro iamīnhi irə trīni mīnuə iərmama riti ruvehe mo kuatia irau Kristo, in rīməuvehe mo in iərmama vi. Noien akuas səvənhi ruvəiwən, nənə noien vi ruvəuvehe.

¹⁸ Narimnari me pam nəha haməuku pen ti Kumwesən. In rīno suatuk ia Kristo mə kīmaha tahəpwəh mwi nəmwəkien in mhəuvehe in me nepwīn. Nənə in rīnəmri pehe wok i ia rəgīmīaha, mə kīmaha tahəvi pehe mwi nərmama səməme haməmwəki in həuvehe in me nepwīn.

¹⁹ Nəgkiariien sə iahaməvisau i mamhəni mə Kumwesən rīno suatuk ia Kristo mə tro nərmama səməme haməmwəki in ia tīprənə i həuvehe in me nepwīn, nənə məpwəh nəvsiniien noien ərəha me səvənraha. Nənə muvei pehe nəgkiariien i m

kimaha mə tahəni irapw mə Kumwesən rino raka suatuk ti nərmama haməmwəki in mə tuhəuvehe in me nepwın.

²⁰ Ro pen kimaha nərmama səməme iahaməgkiari tukwini səvəi Kristo. Rəmwhen mə Kumwesən raməkwein nərmama ia nəgkiariien səkimaha. Nənə iahaməres kimiaha ia nəghi Kristo mə tihəpwəh nəmwəkiiien Kumwesən nənə mhəuvehe in me nepwın.

²¹ Kristo noien ərəha səvənhi riwən. Mətə ti nasituien ia kitaha, Kumwesən ro in ruvehe məmwhen ia noien ərəha. In ro iamınhi irə mə ia Kristo kitaha tsəukurən nuveheien məmwhen ia noien atukwatukw səvəi Kumwesən.

6

¹ Kimaha iahamo wok pəri kimaha Kumwesən. Ro pen iahaməres kimiaha mə nəpın Kumwesən raməriari pehe namasanien səvənhi m kimiaha, tihəpwəh nuvehien rəmwhen ia nəri auər a,

² ti nəri nə mə Kumwesən rani mə,
 “Ia nəpın səvəi nasituien ia iərmama, iakregi kimiaha.

Ia nəpın səvəi nuvehimiruien iərmama, iaka-situ ia kimiaha.”

Hətə ro. Təkwtəkwuni rino nəpın səvəi Kumwesən ti nasituien ia iərmama. Təkwtəkwuni rino nəpın səvəi nuvehimiruien iərmama.

Pol mine in me nepwın kamhəregi rərəha ia narimnari me rıpık

³ Kīmaha iahəpko mhə nari riti mə iərmama riti trīmwei irə, tī nəri nə mə iahəpwəh nokeikeiien mə tukini ərəha wok səkimaha.

⁴ Mətə ia narimnari me pam səməme kīmaha iahamo iahamahatən pen mə kīmaha iotukwininari me pərhiēn səvəi Kumwesən, mamhərer əknekīn ia nəpīn səvəi nəmisəien, mīne nəpīn skai me, mīne nəpīn iahamregi rərəha.

⁵ Nərmama hənousi kīmaha, nənə kuvei pen kīmaha ia kalapus, nənə karīpwi kīmaha mə tukousi kīmaha. Iahəno pik wok, mhəpwəh napriēn ia nəpīn, nukumhə rahi kīmaha.

⁶ Ro nukurənien i mə kīmaha iotukwininari me pərhiēn səvəi Kumwesən tī nəri nə mə iahamo wok noien səkimaha rəmher, kīmaha iahəukurən nari, nətərigiēn səkimaha rəpwəmwīs, iahamo ramasan m nərmama, Nənimwīn Ikinan rukuər ia rerīmaha, kīmaha iahokeikei nərmama ia nokeikeiēn pərhiēn,

⁷ mamhəni a nīpərhiēnien, nənə nīskaiēn səvəi Kumwesən ramarə ia kīmaha. Kīmaha iahamo noien atukwatukw rəmwhēn ia narimnari me səvəi naruagəniēn iahaməuvehi ia rəgīmaha mwatuk mīne mour.

⁸ Nərmama nepwīn haməsiai kīmaha, nepwīn hamo aurīs kīmaha. Nepwīn haməni ərəha kīmaha, nepwīn haməni amasan kīmaha. Nepwīn haməni mə kīmaha ieikuə me, mətə kīmaha iahaməni a nəgkiariēn pərhiēn.

⁹ Kamo m kīmaha rəmwhēn mə kīmaha nərmama kreirei kīmaha, mətə kīmaha kukurən amasan kīmaha. Kamo m kīmaha rəmwhēn mə

iahəuvamhə raka, mətə hətə ro iahaməmiru ihi. Kamousi kimaha, mətə kɪpkousi əpune mhə ihi kimaha.

¹⁰ Kimaha iahamregi rərəha, mətə ia nəpɪn me rerimaha ramagien. Nautə səkimaha riwən, mətə iaho nərmama həpɪk nautə səvənraha rɪpɪk. Nari riti səkimaha riwən, mətə iahaməuvehi narimnari me pam.

¹¹ Nəkur Korin, kimaha iahaməni pehe pam nəgkiariien me m kimiaha mhəpkəpwəh mhə riti. Nənə iahamokeikei kimiaha ia rerimaha pam.

¹² Kimaha iahəpkəsisəg mhə nokeikeiien səkimaha tukumiaha, mətə kimiaha hiaməsisəg səkimiaha tukumaha.

¹³ Təkwətəkwuni nəha iakaməgkiari m kimiaha rəmwhen mə nɪpwnətɪk atukwatukw me nə kimiaha. Ratukwatukw a mə kimiaha mwi tihokeikei kimaha ia rerimiaha pam.

Kumwesən sə ramiru nimwə səvənhi nə kitaha

¹⁴ Kimiaha tihəpwəh nuvehien rəgimiaha me kimiaha nərmama səməme həpkɪni mhə nɪpərhiienien ia Kristo mho pəri wok. Iakani iamɪnha irə tɪ nəri nə mə kimiaha hiəukurən. Noien amasan mɪne noien ərəha trouəfo rouo pəri nari riti? Uə nukuraanien mɪne nəpɪtəvɪen trouəfo rouavən pəri?

¹⁵ Kristo mɪne Setan trouəfo rouni nəgkiariien kuatia? Uə iərmama sə rani nɪpərhiienien ia Kristo mɪne iərmama sə rɪpkɪni mhə nɪpərhiienien irə trouəfo ro nari ia nətəriɡien kuatia?

16 Nimwə səvəi Kumwesən tukəfo kəfwaki m nənimwi nari me ikin? Kumwesən sə ramiru nimwə səvənhi nə kitaha. Rəmwhen Kumwesən rīməni mə,

“Takarə kimaha nərmama me səiou,
nənə mavən kimaha mīnraha,
iou takuvehe Kumwesən səvənraha,
irəha tuhəuvehe nərmama me səiou.”

17 Nənə Iərimənu səkitaha rīməni mə,
“Ro iamīnhi irə, tiharaka ia nirəha,
mhavən isipwīn tī nirəha,
mhəpwəh nīrapīien nəri sə rəmkemik ia nənimek,
rerik ragien mə takuvehi kimiaha,

18 iou takuvehe tata səkimiaha,
nənə kimiaha tihəuvehe nīpwnətik me.
Iou Iərimənu sə iakauvehi nīskaiien me pam,
iakani nəgkīariien nəha.”

7

1 Nərmama keikei me səiou, promes me i səkitaha. Ro pen pwəh səpərhi atukw a kitaha, mhəpeki raka narimnari me pam səməme hamo nīpwrataha mīne nənimwītaha həmkemik ia nəmri Kumwesən. Pwəh so mə noien səkitaha ratukwatukw pam, mo ikinan i, tī nəri nə mə kitaha samhekīr Kumwesən.

Nagienien səvəi Pol

2 Tihəsevər ia rerimīaaha tukumaha. Kimaha iahəpko mhə rərəha ia iərmama riti. Iahəpkivi pen mhə iərmama riti ia kwopun ərəha ikin.

6:16: 1Kor 3:16, Lev 26:12, Esik 37:27
2Saml 7:14, Aes 43:6, Jer 31:9, Rev 1:8

6:17: Rev 18:4 **6:18:**
7:2: Wok Me 20:33, 2Kor 12:17

Iahəpkəmwur mhə mə tahəuvehi nari riti səvəi iərmama riti ia noien ikou.

³ Iou iapkini mhə nəgkiariien i, mini mə hiəno noien ərəha, rekəm. Iakuvəni raka tukumiaha i mə nəri auər a mə tsəmiru pəri uə tsemhə pəri, mətə kimiaha hiamarə ia nətərigien səkimaha ia nəpın me.

⁴ Iou iakamahatətə əknekın ia kimiaha. Ia nəpın me rerik ramagien tukumiaha. Ia nəmisəien me pam səkimaha, kimiaha hiamo rerik raməpwuən, mamagien pik.

⁵ Nəpın iahaməuvehe ia profens Masetonia iahəpkapwis mhə, mətə ia nəpın me nərəhaien rauvehi kimaha, nərmama hənue tuhəvisə m kimaha, nənə kimaha iahekır.

⁶ Mətə Kumwesən sə rauvehi utə nətərigien səvəi iərmama sə rerin rəpou, ruvehi utə nətərigien səkimaha ia nuveheien səvəi Taetas.

⁷ Ripko mhə nuveheien a səvənhi ruvehi utə nətərigien səkimaha, mətə rerimaha ragien mwi ti nəgkiariien səkimiaha sə hiəmāni pen tukwe in riməuvehi utə mwi nətərigien səvənhi. In rimāni pehe tukumaha mə hiokeikei pik mə tihətoni iou, nənə mini mə rerimiaha rəpou pik, hiamərer mwatuk mə tihənise nəgkiariien ərəha me kamini ia nirak. Nəpın iakregi narimnari me nəha rerik ragien pik.

⁸ Rosi nəkukuə kupwən səiou ro kimiaha hiəregi rərəha, mətə iou iapkregi mhə rərəha tukwe. Mətə kupwən iakregi rərəha tukwe, ti nəri nə mə iakətoni mə nəkukuə nəha rino kimiaha hiəregi rərəha, mətə səvəi nəpın ouihi a.

⁹ Mətə təkwtəkwuni rerik ramagien, mətə rəpko mhə rerik ramagien mə iakino kímiaha hiəregi rərəha, mətə ti nəri nə mə nəpın hiəregi rərəha, hiərərig ia noien ərəha səkimiaha. Kímiaha hiəpkouraha mhə kímiaha, ti nəri nə mə nəpın hiəregi rərəha, mətə hiaməti pen ia Kumwesən.

¹⁰ Nəpın səregi rərəha rəmwhen sə Kumwesən rokeikei trukuə kwənkwan in i kitaha tsəpwəh noien ərəha me səkitaha mhəuvehe Kumwesən ruvehimiru kitaha. Nənə reritaha trəpwəh nəpouien ti noien nəha. Mətə nəpın səregi rərəha rəmwhen nərmama səvəi tıprənə kamhəregi trukuə kwənkwan in i kitaha tsemhə.

¹¹ Kímiaha hiəuvəregi raka rərəha rəmwhen sə Kumwesən rokeikei. Nənə hətə ro nəfe raukuə ia kímiaha. Hiamə akwauakw mə tukətoni kímiaha mə nərhəien riwən ia kímiaha, niemaha raməpi kímiaha ti noien ərəha səvəi iərmama nəha, kímiaha hiaməhekir, mamhokeikei pik mə tihətə iou, rerimiaha raməreuən, mamhərer mwatuk ti nəkoui atukwatukwien iərmama sə ramo noien ərəha. Ia noien me pam səkimiaha hiənəhatən mə hiəpko mhə nari riti rərəha ia narimnari me i.

¹² Iakimərai nəkukuə nəha m kímiaha, mətə iap-krai mhə m iərmama i sə rino noien ərəha. Nənə iap-krai mhə mwi m iərmama sə iərmama nəha rino noien ərəha irə, rekəm. Iakimərai mə tihətə sas ia nəmri Kumwesən mə hiamokeikei pərhien kímaha.

¹³ Ro iamınhi irə narimnari me pam nəha haməuvehi utə nətərigien səkimaha. Ouəh, nəgkiariien səvəi Taetas ruvehi utə nətərigien səkimaha.

Nari riti mwi, rerimaha ragien pik nəpin iahətoni nagienien səvənhi, ti nəri nə mə kimiaha hio nətərigien səvənhi rapwis.

¹⁴ Fwe kupwən iakiməni pen tukwe in mə iakamərpwi iou tukumiaha, nənə kimiaha hiəpko mhə iou iakauris. Narimnari me pam səməme iahəməni tukumiaha ho nīpərhienien. Ia noien a mwi nəha, narimnari me pam ia kimiaha iahəməni pen ti Taetas i, mamhərpwi kimaha tukwe, ho nīpərhienien.

¹⁵ Taetas rerin ramrhi ihi mə kimiaha pam anan hiəno nəkwan, nənə mhehekir mhətəmnimwin nəpin hiəsəni in mə truvehə mətoni kimiaha. Nəpin rerin rirhi narimnari me nəha, nokeikeien səvənhi ramasori pik anan mwi tukumiaha.

¹⁶ Rerik ramagien pik tukumiaha ti nəri nə mə iakani nīpərhienien ia kimiaha mə kimiaha hiamo noien atukwatukw.

8

Nakalasia me fwe Korin tuho sampam ia wok sə hənə vi a ia nuk kurirə

¹ Piak me, kimaha iahokeikei mə tihəukurən namasanien səvəi Kumwesən sə raməriari pen irə m nakalasia me fwe profens Masetonia mə irəha həukurən nasituien ia nərmama nepwin mwi.

² Irəha hənərə ia nəpin sikai riti rəknekən ti nirəha, mətə rerinraha ramagien a ia nəpin me. Nautə səvənraha riwən, mətə housəsimwin mane asori mhəuvei pen m nakalasia me ia kwopun me.

³ Iakani nīpərhienien tukumiaha i mə irəha həuvei pen mane səvənraha sə raməmak

rəmwhen a, harə mhəuvei pen asori anan mwi. Rerınraha ragien a mə pwəh ho.

⁴ Irəha hənəres kimaha nəpın rıpık mə tahəsəni pwəh irəha hasitu ia wok səvəi nuvei penien mane m nərmmama me səvəi Kumwesən fwe Jerusalem.

⁵ Rerımaha rıpkırhi mhə mə irəha tuho rasori iamınha irə, mətə hənə. Irəha haməkupwən mhəuvei pen nımıruien səvənraha m Iərımənu səkitaha, kurirə həuvei pehe mwi nımıruien səvənraha m kimaha ia noien sə Kumwesən rokeikei.

⁶ Nəpın hiəno vi a wok nəha ti nousəsımwinien mane nəha, rerımiaha ragien a tukwe. Ti nəri nə mə Taetas ramiri kımiaha irə, iahaməni pen tukwe in mə tro wok kımiaha min meste wok nəha ro sampam.

⁷ Ia narımnari me pam kımiaha hiaməuvehi raməpi raka anan. Ia noien səvəi nahatətəien, noien səvəi nəgkiariien, mine noien səvəi nukurənien, kımiaha hiəuvehi rəpi raka. Kımiaha hiəskai mwi ti nasituien, nənə mhokeikei pik mwi kımaha. Ro iamınhi irə kımaha iahokeikei mə ia nokeikeiien səkımiaha tihasitu asori mwi ia wok i.

⁸ Iapkını mhə mə tihaməkeikei mho. Mətə iakamahatən m kımiaha mə nərmmama əpə me rerınraha ragien ti nasituien ia wok nəha. Nənə təkwtəkwwuni nəha iakuə takətə sas ia nokeikeiien səkımiaha mə ro nıpərhiienien rəmwhen ia nokeikeiien səvənraha uə rekəm.

⁹ Kımiaha hiəukurən amasan namasanien səvəi Iesu Kristo Iərımənu səkitaha sə rınəriari pehe

irə m k̄imiaha. Nautə səvənhi rasori, mətə r̄ino tukumiaha mə nautə səvənhi riwən. Nənə ti nəri nə mə in r̄ino mə nautə səvənhi riwən, nənə mo k̄imiaha nautə sək̄imiaha rasori.

¹⁰ In i nətərigien səiou sə trasitu ia k̄imiaha ia narimnari me i. Ramasan mə tiho sampam ia wok sə hiəno vi a ia nuk kurirə. Rer̄imiaha r̄iməkupwən m̄irhi mə tiho wok nəha, nənə k̄imiaha hiaməkupwən mho.

¹¹ Ramasan mə təkwtək̄wuni tihaməmwur ia noien wok nəha mho sampam irə. Ramasan mə tihəskai mwi ti noien sampam irə rəmwhen ia nətərigien sək̄imiaha r̄iməskai fwe kupwən ti noien. Nənə ramasan mə tiho ia mane me sək̄imiaha.

¹² Tr̄ini minuə rer̄imiaha ragien ti nuvei penien, Kumwesən rer̄in tragien ti nuvehien a narimnari me səməme hiaməuvehi mamhəuvei pen min. In ripkəres mhə narimnari me səməme həiwən tukumiaha.

¹³ Iakəpwəh nokeikeien mə n̄im̄iruien səvəi nərmama nepw̄in tr̄iməru ti nəri nə mə haməuvehi mane me sək̄imiaha, mətə n̄im̄iruien sək̄imiaha tr̄iskai ti nəri nə mə hiənasitu ia nirəha, rekəm. Iakokeikei mə trəmnəmwhen a tukumiaha pam.

¹⁴ Təkwtək̄wuni, ti nəri nə mə narimnari me sək̄imiaha ruvəpik, ramasan mə tihasitu ia nərmama nepw̄in səməme narimnari me səvənraha riwən. Nənə tr̄ini minuə nəp̄in nepw̄in sək̄imiaha riwən nənə səvənraha rasori, irəha tuhasitu mwi ia k̄imiaha. In i suatuk nərmama tuhəuvehi rəmnəmwhen a.

15 Rəmwhen ia nəgkiariien i kimərai pen ia Nəkukuə Ikinan rani mə,
 “Iərmama sə rousəsimwin nəveginien ripik, mətə rəmwhen a ripkəpi raka mhə.
 Nənə iərmama sə rousəsimwin nəveginien rouihi, mətə rəmwhen a ripkiwən mhə.”

Kərhi pen Taetas revən fwe Korin

16 Iakani tanak m Kumwesən ti Taetas, ti nəri nə mə Kumwesən rino in rerin rokeikei pik mə trasitu ia kimiaha rəmwhen iakokeikei.

17 Nənə Taetas rerin ragien mə tro narimnari me nəha səməme iahaməni pen tukwe, mətə nari riti mwi, rerin ragien pik mə trasitu ia kimiaha. Nənə nətərigien a səvənhi mə truvehe mətoni kimiaha.

18 Nənə tahərhi pehe mwi piəvtaha riti mwi ruvehe irau min. Iərmama nəha raməvisau irapw nəgkiariien amasan səvəi Kristo, nakalasia me pam haməgnəgini in tukwe.

19 Ripko mhə nəri əpa nəha, mətə nakalasia me hənərpwi rəginraha ia iərmama nəha mə truvehe kimaha min iahəuvehi mane sə rerimiahaha ragien hiəuvei pehe. Kimaha tahəuvehi mane nəha, mhəuvehi mhəuvən, mhəuvei pen m nakalasia me fwe Jerusalem, mhəuvehi utə nəghi Iərimənu səkitaha irə, nənə mamhahatən mə rerimaha ragien pik ti nasituien.

20 Kimaha iahamətui amasan ti mane asori i kamo iərmama riti rini ərəha kimaha mə iahənəfo irə ia mane.

21 Ro iamınhi irə ti nəri nə mə kimaha iahaməmwur mə taho nəri atukwatukw, mətə ripko

mhə ia nəmri Iərimənu a səkitaha, mətə ia nəmri nərmama me mwi.

²² Nənə tahərhi pehe piəvtaha riti mwi ruvehe irəhar iəmənmi i. Iərmama nəha, kimaha ia-haməmwur mə tahətə sas irə nəpɪn rɪpɪk. Nənə ia nəpɪn me kimaha ia-hətoni mə rerɪn ragien pɪk mə trasitu. Nənə təkwtək-wuni nəha rerɪn ragien pɪk mwi mə trasitu ia nirau, ti nəri nə mə in rɪni nɪpərhienien ia kimiaha.

²³ Kimiaha hiəuvəkurən raka Taetas. In ramo wok pəri kimrau min ti nasituien ia kimiaha. Nənə piəvtaha mi səməmi kroukurirə in, irau iəmə mi sə nakalasia me hənərhi irapw irau, nənə irau krauvehi utə nəghi Kristo.

²⁴ Ramasan mə tiho ramasan ia nirəhar pwəh irəhar mine nakalasia me pam hətoni nokeikei-ien səkimiaha mə ro nəri pərhien riti. Pwəh irəha hətoni mə nəgkiariien səkimaha ia-haməni mamhəuvehi utə nəghimiaha irə ro nɪpərhienien.

9

¹ Trɪni mɪnuə iapkra i mhə nəkukuə i m kimiaha, ramasan a ti nəri nə mə hiəuvəkurən raka wok i səvəi nasituien ia nakalasia me fwe Jerusalem.

² Iou iakukurən mə hiokeikei mə tihasitu. Iakau-vehi utə noien amasan səkimiaha ia nəmri nəkur Masetonia, mani pen ti nirəha mə ia nuk kurirə kimiaha fwe Akaea hiənərər mwatuk ti nasituien. Nəpɪn hətoni rerɪmiaha ragien pɪk ti nasituien, ro mwi irəha həpɪk hokeikei mə tuhasitu mwi.

³ Mətə təkwtək-wuni nəha iakərhi pehe piəvtaha me i mə irəhar tuharuvehe mharətoni kimiaha mə kimiaha ti-həuvei pen mane me nəha mɪnraha

rəmwhen iakuvəni raka tukumiaha. Ro iam̄nhi irə nəgkiariien səkimaha səvəi nuvehi utəien noien amasan səkimiaha r̄ipko mhə nəri auər.

⁴ Mətə tr̄ini m̄inuə hiəpko mhə, nəp̄in iakuvehe kimaha nəkur Masetonia nepw̄in, tuhətoni mə hiəpko mhə ihi. Noien nəha tro kimaha iaħauris ti nəri nə mə iaħəuvəvehi utə raka kimiaha. Tro kimiaha ħiauris mw̄i məpi raka.

⁵ Ro pen rerik r̄irhi mə takaməkeikei m̄ares piəvtaha mirəhar mə irəhar tuħarukupw̄ən mħaruvehe mħarətoni kimiaha nənə mħaro sampam ia wok ti nuvei peheien mane sə ħiəuvəni raka mə tihəuvei pen. Mətə iakokeikei mə mane nəha sə tihəuvei pen ruku pen a ia rerim̄iaha mə tihəuvei pen r̄ipko mhə iərmama riti raməkeikei m̄ kimiaha mə tihəuvei pen.

Kumwesən raməkeikei iərmama sə rauvei pen nasituien m̄ nərmama ia rer̄in agien

⁶ Tihəpw̄əħ nenouenouiien nəri i. Iərmama sə rəpwei ouihi nuni nari tresi ouihi. Iərmama sə rəpwei r̄ipik tresi r̄ipik.

⁷ Kimiaha kuatia kuatia tihaməkeikei mhəuvei pen nəfe ħiaməni ia rerim̄iaha mə tihəuvei pen. Tr̄ini m̄inuə rerim̄ r̄ipkagien mhə tukwe, rəpw̄əħ namasanien mə tikuvei pen. Tr̄ini m̄inuə ikuvei pen ti nəri nə mə iərmama riti raməkeikei mik mə tikuvei pen, r̄ipkamasan mhə mw̄i. Iak̄ini iam̄nhi irə ti nəri nə mə Kumwesən rokeikei iərmama i rauvei pen ia rer̄in agien.

⁸ Kumwesən rukurən nəriari peheien namasanien me p̄am anan m̄ kimiaha mə ia nəp̄in me ia narimnari me p̄am tihəuvehi narimnari

me pam sɛmɛme hatukwatukw mə tihaməkeikei
mhəuvehi, nənə mhəuvehi rɪpɪk mwi mə tihauai
m nərɪmama.

⁹ Rəmwhen ia nəgkiariien i kɪmərɪai pen ia
Nəkukuə Ikinan rani mə,

“In ruai narimnari me səvənhi rɪpɪk m nərɪmama
nautə səvənraha riwən,
nənə noien amasan səvənhi ramarə rerɪn.”

¹⁰ Kumwesən in rauvei pen nuni nari m iərɪmama
sə raməmhu, mauvei pen nəveginien tɪ nənɪien.
Ia suatuk kuatia a in truvei pehe narimnari rɪpɪk
m kɪmɪaha mo rasori mwi mə kɪmɪaha hiəukurən
nasituien ia nərɪmama nepwɪn mwi. In tro
kwənkwan rɪpɪk sə ruku pen ia noien atukwatukw
səkɪmɪaha.

¹¹ Ia narimnari me pam ia nɪmɪruien səkɪmɪaha,
Kumwesən truvei pehe namasanien səvənhi m
kɪmɪaha mə kɪmɪaha hiəukurən nəriariien ia nəpɪn
me. Nəpɪn kɪmaha tahəuvehi nasituien səkɪmɪaha,
mhəuai, mhəuvei pen m nərɪmama, irəha tuhəni
tanak m Kumwesən tukwe.

¹² Wok amasan i sə hiamo trɪpkasitu əpa mhə
ia nakalasia me sɛmɛme narimnari me səvənraha
riwən, mətə tro nərɪmama həpɪk rerɪnraha ragien,
nənə həni tanak m Kumwesən tukwe.

¹³ Tɪ nəri nə mə kɪmɪaha hiamo wok amasan i,
ro pen hiamo pui noien səkɪmɪaha m nərɪmama
həpɪk. Irəha tuhəuvehi utə nəghi Kumwesən
tukwe tɪ nəri nə mə kɪmɪaha hiamo pərɪhien noien
səvəi nərɪmama sɛmɛme haməni nɪpərɪhienien ia
nəgkiariien amasan səvəi Kristo, rerɪmɪaha ragien

hiəuvei pen mane asori səkimiaha mınraha mine nərmama me.

¹⁴ Irəha tuhəfwaki tukumiaha, nənə mhokeikei kımiaha, ti nəri nə mə hətoni mə Kumwesən rınəriari pehe namasanien səvənhi m kımiaha rəpi raka anan mə tihasitu ia nirəha.

¹⁵ Pwəh səni tanak m Kumwesən ti nəfe in rıməuvei pehe m kitaha ramasan pik məpi raka.

10

Pol raməgkiari m nərmama nepwın kamhəni ərəha in

¹ Nərmama nepwın haməni mə nəpın kitaha m kımiaha nətərigien səiou reiwaiu, mətə nəpın iakier məpwəh kımiaha, noien sə iakamo m kımiaha riskai pik. Mətə iou Pol, iakokeikei mə takıni nari riti tukumiaha i. Kristo, in nətərigien səvənhi reiwaiu. In iərmama riti noien səvənhi ramasan mıməru. Ia noien a mwı nəha

² iakaməres kımiaha mə tiho noien səkimiaha ratukwatukw mə nəpın iakuvehe, iakəpwəh nəgkiari skaiien m kımiaha. Mətə iakukurən amasan mə takəgkiari skai m nərmama me nepwın səməme haməni mə iahamesi pen noien səvəi tıprənə i.

³ Nıpərhiendien, kımaha iahamarə ia tıprənə i, mətə iahamaruagən, mhəpkesi pen mhə noien kamaruagən irə səvəi tıprənə i.

⁴ Iakani iamınhi irə ti nəri nə mə narımnari me səkimaha iahamərer irə mamharuagən rıpkə mhə narımnari me səvəi tıprənə i, mətə həskai ia nıskaiien səvəi Kumwesən. Ia narımnari me

nəha kımaha iahaməuvehi irapw kwopun skai me kamərkwafə ikın. Iahaməuvehi irapw mwi nəgkiariien eikuə me

⁵ mine nəgkiariien ərpwi me səməme hamənise nərmama ti nukurənien Kumwesən. Iahamaruagən ia nətərigien me pam səvəi nərmama, mamho irəha həuvehe mho nəkwai Kristo.

⁶ Nəpın kımiaha tihamo nəkwai Kristo ia narimnari me pam, kımaha tahamərer mwatuk ti nəkoui atukwatukwien kımiaha trini minuə hio mwi noien ərəha me.

⁷ Kımiaha hiaməkiri nari mamhesi pen a nəfe hiamətoni iruə, mətə tihaməkeikei mhəukurən nəri i. Trini minuə iərmama riti rukurən pərhiən mə in iərmama səvəi Kristo, nənə in trətəriğ amasan mwi mə kımaha mwi nərmama səvəi Kristo iahəmwhen irə.

⁸ Nəri auər a mə iakaməgkiari mamərpwi iou kwopti ti nasoriien sə İərimənu səkitaha rıməuvei pehe miou, mətə ko iapkauris mhə tukwe. Rıməuvei pehe nasoriien nəha miou mə takuvrhəkin kımiaha hiəuvehe mhəutə, mətə rıpkuvei pehe mhə nasoriien nəha miou mə takuvehi irapw kımiaha.

⁹ Iakəpwəh nokeikeiien mə kımiaha tihətə mə iakamrai nəkukuə me i mə kımiaha tihəhekir.

¹⁰ Iakani iamınhi irə ti nəri nə mə nərmama nepwın haməni iou mə, “Nəkukuə səvənhi riskai mıpam, mətə nəpın ramavən kitaha min, rıpkə mhə in iəmə sikai riti, nənə nəgkiariien səvənhi ro nəri auər a irə.”

11 Pwəh nərmama sə ro me iamɪnha irə həukurən nəri i. Nəfe kimaha iahamərai ia nəkukuə nəpɪn iahamarə isipwɪn, tahamo rəmwhen nəpɪn samarə pəri.

12 Rəknekɪn tukumaha ko iahəpkərer mhə kimaha nərmama me nəha səməme haməgnəgɪni atukw a irəha. Rəknekɪn mwɪ tukumaha ko iahəpkətə əmwhen mhə kimaha mɪnraha. Nərmama me nəha hamətə əmwhen irəha me mamhəkiri irəha me mə sin in iəmə asori mɪne sin rɪpko mhə in iəmə asori. Mətə nəpɪn kamho iamɪnha irə ramahatən pen mə həpkukurən mhə nari.

13 Mətə kimaha tahəpkəgkiari ərpwi mhə məpi raka nari. Kimaha tahəgkiari ərpwi əpa ti wok sə Kumwesən rɪməuvei pehe m kimaha. Wok i kimaha iahamo rɪneste raka mwɪ kimiaha.

14 Ro pen kimaha iahəukurən nəgkiari ərpwiien. Nəpɪn iahamo iamɪnhi irə, iahəpwəh nəpi rakaien wok səkimaha, ti nəri nə mə kimaha nə nərmama iahaməkupwən mhəuvehi nəgkiariien amasan səvəi Kristo mhəuvehe tukumiaha.

15 Kimaha iahəpkəgkiari ərpwi mhə ti wok sə iərməpə rɪno, mətə iahaməgkiari ərpwi a ia wok sə Kumwesən rɪnəmri pehe m kimaha. Kimaha iahokeikei mə nahatətəien səkimiaha truvehe masori, ro pen wok səkimaha ia rerimiahaha truvehe masori mwɪ,

16 mo kimaha iahəukurən nəvisaiien nəgkiariien amasan səvəi Kristo ia tənə me ia kwopun səkimiaha mevən evən mwɪ. Ia noien nəha kimaha iahəpko mhə wok ia kwopun

riti sə iərmama riti rino raka wok ikin, nənə mhəpkəgkiari ərpwi mhə ti wok səvəi iərməpə.

¹⁷ Mətə Nəkukuə Ikinan rani mə,
 “Pwəh iərmama sə raməgkiari ərpwi,
 trəgkiari ərpwi a ia narimnari me səməme
 Iərimənu səkitaha rino.”

¹⁸ Iakani iamini irə ti nəri nə mə kirkəsəni
 mhə iərmama sə raməgnəgini atukw a in,
 mətə kaməsəni iərmama sə Iərimənu səkitaha
 raməgnəgini in.

11

*Pol raməgkiari ia nərmama nepwin komhə irəha
 aposol pərhien me səvəi Kristo*

¹ Iakokeikei mə tihəpwəh nəpouien iou pwəh
 iakini narməriien səiou kwopti m kimiaha. Hətərig
 iou mhəpwəh nəpouien.

² Rerik ramevən pik ia kimiaha məpwəh
 nokeikeien mə tihəkurirə iərməpə. Noien nəha
 səiou raku pen ti Kumwesən. Iakani iamini irə
 ti nəri nə iakimərfi kimiaha mə tihesi pen iərman
 kuatia a in nə Kristo. Iakino iaminha irə mə
 takuvei pen kimiaha min hiəmwhen ia prən vi riti
 rəmher ramreirei ihi iərman.

³ Mətə iakamhekir kimiaha kamo hiəmwhen ia
 If, prən nəha sə snek rineikuə irə ia nəgkiariien
 əsien səvəhi. Iakamhekir mə kamo iərmama riti
 rivi pen nətərigien səkimiaha ia kwopun əpə nənə
 hiəpwəh nokeikeien i ratukwatukw məmher sə
 hiamo m Kristo.

⁴ Iakani iamini irə ti nəri nə mə rerimiaha
 ragien a hiaməsəni nərmama nepwin

kamhəuvehe mamhəvisau m kímiaha Iesu riti sə ropə ia Iesu i kímaha iahaməni irapw. Rerímiaha ragien a hiaməseni irəha kamhəuvei pehe m kímiaha nənimwɪn riti uə nəgkiariien amasan riti sə ropə ia Nənimwɪn i mɪne nəgkiariien amasan i kímiaha hiəuvəuvehi raka tukumaha.

⁵ Nərmama me nəha kamhəuvehe tukumiaha, kímiaha hiaməni mə irəha “aposol asori me,” mətə ia nətərigien səiou iapkətoni mhə mə irəha hasori mhəpi raka iou.

⁶ Rosi kípkahtən amasan mhə iou ia nəgkiariien, mətə iakukurən amasan nukune nəgkiariien amasan. Kímaha iahənahatən kímiaha ia nəri nəha ia noien me pam nəpɪn rɪpɪk.

⁷ Nəpɪn iakinani irapw nəgkiariien amasan səvəi Kumwesən m kímiaha, iapko mhə mə tihərəku iou tukwe. Iou iakuvehi irapw atukw a iou tɪ nuvehi utəien kímiaha. Nənə rəfo? Noien nəha in noien ərəha riti? Rekəm!

⁸ Nəpɪn iakinamo wok kítaha m kímiaha, nakalasia me ia kwopun əpə me kamhərəku iou. Ipaka rəmwhen mə iakamakres mɪnraha tɪ nasituien ia kímiaha.

⁹ Nənə nəpɪn iakamarə kítaha m kímiaha, nari riti səiou riwən, iapkəres mhə iərmama riti tɪ nasituien tɪ nəri nə mə piəvtaha me səməme haməuku pen ia Masetonia haməpeki pehe səiou me narimnari səməme həiwən. Ro pen iapkəres mhə nari riti tukumiaha, nənə mɪpkuvei pehe mhə wok sikai m kímiaha tɪ nətoniien iou, nənə takamo iamɪnha irə

11:5: 1Kor 15:10, 2Kor 12:11, Kal 2:6 **11:6:** 1Kor 2:1,13, Efes 3:4

11:7: 1Kor 9:12,18 **11:8:** Fil 4:15-18 **11:9:** 2Kor 12:13

ia nəpɪn me.

¹⁰ Iou iakamərpwi iou ti nəri nə mə iakaməvisau irapw nəgkiariien amasan kɪpkərəku mhə iou irə. Rəmwhen ia nɪpərhiendien səvəi Kristo ramarə ia nirak, iakani pərhiendien mə iou tapko əpəiti mhə mwi ia kwopun riti ia profens Akaea.

¹¹ Rəfo iakəpwəh nəresien nari riti tukumiaha? Ti nəri nə mə iapkokeikei mhə kɪmiaha? Rekəm! Kumwesən rukurən mə iakokeikei kɪmiaha.

¹² Ia noien i sə iakamo takarɪpɪn mamō nəha təkwtəkwwuni mə trɪnise nəgkiariien səvəi nərmama me nəha səməme haməfiutə ia nɪrəha mə irəha aposol me. Iakokeikei mə tako rəknekin ti nɪrəha ti nɪniien mə kamho wok ia noien i kɪmaha iahamo wok irə.

¹³ Nərmama me iamɪnha irə, irəha aposol eikuə me. Hameikuə ia nərmama ia wok səvənraha, mamhəuvsini noien səvənraha ti noien mə nərmama tuhətoni mə irəha həmwhen ia aposol me səvəi Kristo.

¹⁴ Mətə nənimetaha trəpwəh nierien ia noien nəha. Nəri auər a mə Setan, mətə rukurən nuvsini-ien noien səvənhi ti noien mə nərmama tuhətoni mə in rəmwhen ia agelo riti səvəi nukuraanien.

¹⁵ Ro pen rɪpko mhə nari riti sə nənimetaha trier tukwe trɪni mɪnuə iotukwininari me səvəi Setan həuvsini noien səvənraha mə tuho nərmama hətōni irəha rəmwhen mə irəha iotukwininari me səvəi noien atukwatukw. Nəpɪn sampam səvənraha tuhəuvehi nərpwɪnien tresi pen a noien me səvənraha.

Pol raməgkiari ərpwi ti nəmisəien me səvənhi

¹⁶ Iaksmwatuk mwi. Pwəh iərmama riti riwən

rerin rirhi mē iou iakamarməri. Mətə trini minuə rerimiaha rirhi iaminha irə, nənə hiəsəni iou pwəh iako noien səvəi narməriien kwopti, nənə mægkiari ərpwi kwopti.

¹⁷ Nægkiariien i səiou, Iərimənu səkitaha ripkini pehe mhə miou mē takini. Mətə iakamægkiari a rəmwhen ia iarməri riti.

¹⁸ Nərmama həpik haməfiutə ia nirəha ti noien me səvəi tivrənə, nənə ro iamihhi irə, iou mwi takægkiari ərpwi.

¹⁹ Rerimiaha rirhi mē hiəukurən amasan nari, nənə ro pen hiaməsəni a nərmama me səməme hamarməri.

²⁰ Nəri auər a mē nərmama me nəha həkwi kimiaha mē tiho nəkwanraha, uə hamakres m kimiaha, uə haməuəsi kimiaha rəmwhen ia kwənkru, uə haməuvehi utə irəha ia nənimemiaha, uə haməpwi nənimemiaha, mətə rerimiaha ragien a ti nəseniien irəha ho iaminha irə.

²¹ Iou iakamauris ti niniiien mē kimaha niskaiien səkimaha riwən ko iahəpko mhə noien me nəha ia kimiaha.

Iakamægkiari rəmwhen ia iarməri riti, mətə nəfe nəghin sə nərmama me nəha hokeikei mē tuhəfiutə irəha tukwe, iou mwi takægkiari ərpwi tukwe.

²² Irəha nəkur Hipru? Iou mwi. Irəha nəkur Isrel? Iou mwi. Irəha kwənəkwus me səvəi Epraham? Iou mwi.

²³ Irəha iotukwininari me səvəi Kristo? Iou mwi, mətə iou iakəpi raka irəha. Rosi iakamægkiari rəmwhen ia iarməri riti, mətə iakino pik wok məpi

raka irəha. Nənə kuvei pen iou ia kalapus nəpɪn rɪpɪk rəpi raka irəha. Kərisi iou rəpi raka irəha. Nənə ipaka iakemhə nəpɪn rɪpɪk.

²⁴ Nəpɪn krirum nəkur Isrel hərɪsi iou m toti-naen.

²⁵ Nəpɪn kahar nəkur Rom həuəsi iou ia kwərgi nei. Nəpɪn riti kəkwi iou ia kəruətərei. Nəpɪn kahar iakevən ia nɪtətə nənə nɪtətə rəmwhenimw. Nəpɪn riti iakeiai fwe ia təmwei təsi nəpɪn pekɪn riti ia nəpɪn mɪne ia ran.

²⁶ Nəpɪn me pam iakamavən tɪ noien wok səiou, maməsiari tɪ iapiwən asori me ia nəkwətənə me, nənə mamarə ia kwopun ərəha ikɪn imwei rakres me, mɪne ia kwopun ərəha ikɪn imwei nəkur imwak me nəkur Isrel, mɪne ia kwopun ərəha ikɪn imwei nərmama rɪpko mhə irəha nəkur Isrel, mɪne ia kwopun ərəha ikɪn ia taon asori, mɪne ia kwopun ərəha ikɪn ia kwopun akwesakwes ikɪn, mɪne ia kwopun ərəha ikɪn fwe ia təsi, mɪne ia kwopun ərəha ikɪn imwei nərmama səməme haməni mə iou me nepwɪn nəha irəha, mətə hameikuə.

²⁷ Iakinowok pɪk mɪsese, nənə nəpɪn rɪpɪk iapkapri mhə ia nəpɪn. Nəpɪn me nepwɪn nukumhə rahi iou, nənə iakəkəkwa. Nəpɪn rɪpɪk nəvegɪnien sənək riwən. Nənə nəpɪn rɪpɪk iakaməkure tɪnari me səiou rɪpkəmwhen mhə tɪ nəkwieien.

²⁸ Narimnari nepwɪn mwi səməme iapkini mhə, mətə riti ia nirəha in i ia nəpɪn me rerɪk ramrhi pɪk nakalasia me ia kwopun me, iakamregi rəmwhen

11:24: Dut 25:3 **11:25:** Wok Me 16:22, 14:19 **11:26:** Wok Me 9:23, 14:5 **11:27:** 1Kor 4:11, 2Kor 6:5 **11:28:** Wok Me 20:18-21,31

ia nəri pam riti iakaməvrani.

²⁹ Nəpın iərmama riti rıpkiskai mhə, nənə iou mwi iakamregi mə iapkiskai mhə. Nəpın ko iərmama riti rımwei ia nərəhaien, nənə rerik raməmisə pı̄k tukwe.

³⁰ Iou takaməkeikei mægkiari ərpwi, mətə takəgkiari ərpwi a ti narımnari me səməme kamhahatən pen mə nıskaiien səiou riwən.

³¹ Kumwesən i in Kumwesən mine Tata səvəi Iesu Iərimənu səkitaha sə kaməgnəgini in ia nəpın me ia nuk nuk me, in rukurən mə iou iapkeikuə mhə.

³² Fwe taon nəha Tamaskes iəmə asori sə ramarə tegin Kig Aretas rokeikei mə trəkwtəmhiri iou. Rəmri naruagən me səvənhi ia kwəruə asori səvəi taon mə tuhəkwtəmhiri iou mhəuvehi puvnimwə iou ia kalapus.

³³ Mətə kiməvai pen iou ia tənəripw asori riti krukwi pen nəkwus irə kuvei pen ia rui nəpai riti, nəpai sə ramərer kuraukurau ia taon nəha, karaka mərməru ia nəkwus reiwaiu, nənə iakap iəmə asori nəha rəpwəh nəkwtəmhiriien iou.

12

Pol raməgkiari ia vıson me səməme Kumwesən rınəriari pen min

¹ Takaməkeikei mægkiari ərpwi nəri auər a mə noien nəha ko rıpkə mhə nari riti ramasan. Mətə takaməkeikei mevən mini vıson me nepwın mine narımnari me nepwın Iərimənu səkitaha rıno pui miou.

² Iakukurən iərman riti sə rıməni nı̄pərhiēnien ia Kristo.^a Nuk fotin rukurau raka, Kumwesən rıməuvehi in mevən fwe irənhə ia neiai nəha sə ro kahar irə. Iakreirei mə revən ia nı̄pwran uə nənımwın rier ia nı̄pwran mevən, Kumwesən əpa rukurən.

³ Iakini mwi mə iakreirei mə revən ia nı̄pwran uə nənımwın rier ia nı̄pwran mevən, Kumwesən əpa rukurən. Mətə iakukurən mə iəmə nəha,

⁴ Kumwesən rıməuvehi utə revən fwe kwopun nəha Parataes, nənə in rıməregi nəgkiariien afafa me səməme iərmama rı̄reirei niniien.

⁵ Iou takəgkiari ərpwi ti sə ro iamınha irə, mətə tapkəgkiari ərpwi mhə tukw iou atukw. Narimnari me səməme kamhahatən pen mə niskaiien səiou riwən, irəha əpa nə takəgkiari ərpwi tukwe.

⁶ Mətə rəfo? Trini minuə iakokeikei mə takəgkiari ərpwi, komhə iou iərmama riti iakamarməri, ti nəri nə mə nəgkiariien sə iakani ro nı̄pərhiēnien. Mətə iapkəgkiari ərpwi mhə iamınha irə ti nəri nə mə iakəpwəh nokeikeiien mə iərmama riti truvehi utə iou irənhə məpi raka nəri sə ratukwatukw. Iakokeikei mə trətōni iou rəmwhen ia nəfe tako uə takini.

⁷ Vison me nəha Iərımənu rino pui miou rı̄pik.^b Ti nıniseien iou mə takəpwəh nəfiūtəien iou ia vison me nəha iakinətōni, kuvei pehe nari riti miou rəmwhen ia təsi nımırhi riti raməpi nı̄pwrak, məmwhen mwi ia iəremhə riti ruku pen ti Setan

^a **12:2:** Ia kwopun i Pol raməgkiari ia iərman riti, mətə iərman nə in nə Pol. **12:5:** 2Kor 11:30 **12:6:** 1Kor 10:8, 1Kor 11:16 **12:7:** Job 2:6 ^b **12:7:** Narimnari me i Pol raməgkiari irə Kumwesən rino pui pen min ia vison me rətōni fwe ia neiai sə ro kahar irə.

mamo n̄amis̄aien miou. Kuvei pehe n̄ari n̄aha miou m̄a tak̄əpw̄əh n̄əfīaut̄aien iou ia narimnari me n̄aha Īərim̄ənu s̄əkitaha r̄ino pui miou.

⁸ Iakin̄əres Īərim̄ənu s̄əkitaha m̄ kahar m̄a tru-vehi raka n̄ari n̄aha pw̄əh r̄əpw̄əh noien n̄amis̄aien miou.

⁹ M̄ət̄ə Īərim̄ənu r̄ini pehe tukw iou i m̄a, “Namasien s̄aiou r̄in̄əmwhen raka trasitu ia niram. N̄əp̄in̄ n̄iskaiien s̄aim̄ riw̄ən, n̄iskaiien s̄aiou truvehe masori ia niram.” Ro pen rerik ramagien m̄a tak̄əgkiari ərpwi ia n̄im̄iruien s̄aiou s̄ə n̄iskaiien riw̄ən ir̄ə, m̄a n̄iskaiien s̄əv̄ai Kristo trar̄ə ia n̄im̄iruien s̄aiou.

¹⁰ Ro pen iou rerik ramagien a ia n̄əpouien me, n̄ini ər̄əhaien me, n̄əp̄in̄ skai me, nomet̄aien me, m̄ine n̄ər̄əhaien me nepw̄in̄ mwi s̄əm̄əme kamo ia nirak ti n̄ari n̄ə m̄a iou īərmama riti s̄əv̄ai Kristo. Rerik ramagien a ti n̄ari n̄ə m̄a n̄əp̄in̄ n̄iskaiien s̄aiou riw̄ən, n̄ən̄ə n̄əp̄in̄ n̄aha in̄ n̄aha iakauvehi n̄iskaiien.

Pol ram̄əgkiari skai m̄ n̄əkur Korin

¹¹ T̄əkw̄t̄əkw̄uni iakam̄əgkiari iakəmwhen ia īərmama riti ramarm̄ari, m̄ət̄ə k̄im̄iaha hīən̄əkeikei miou ti noien iam̄in̄hi ir̄ə ti n̄ari n̄ə m̄a ratukwatukw m̄a tih̄əgn̄əḡini iou, m̄ət̄ə hīən̄əpw̄əh noien. Rosi iou īəm̄ə aūər a, m̄ət̄ə aposol me n̄aha s̄əm̄əme hiam̄əni m̄a ir̄əha hasori, iou iap̄k̄ətoni anan mh̄ə m̄a ir̄əha hasori anan ia nirak.

¹² N̄əp̄in̄ iakin̄amar̄ə k̄itaha m̄ k̄im̄iaha, iakamo n̄im̄t̄ətien me s̄əm̄əme kamhahat̄ən m̄a iou aposol p̄ər̄hien riti. Iakin̄amo n̄im̄t̄ətien me, m̄ine narimnari me s̄əm̄əme n̄ərmama h̄ətoni n̄ənimenraha

rier. Iakinamo narimnari me nepwin mwi ia niskaiien sɔvɔi Kumwesɔn ia rerimiahaha, nɔnɔ mo nɔtɔrigien sɔiou rɔpwɔmwis.

¹³ Noien amasan sɔ iakinno m kimiahaha rɔmwhen a iakinno m nakalasia me pam, mɔtɔ nari kuatia ropɔ in nɔ iapkɔres mhɔ mane tukumiahaha. Mɔ noien nɔha rɔrɔha enouenou ia nɔrɔhaien sɔiou.

¹⁴ Tɔkwɔtɔkwuni iakamɔrer mwatuk mɔ takuvehe mɔti pehe kimiahaha sɔro kahar irɔ. Nɔnɔ tapkɔres mhɔ mane tukumiahaha, ti nɔri nɔ mɔ iakɔpwɔh nokeikeien nautɔ sɔkimiahaha, mɔtɔ iakokeikei a kimiahaha. Hɔregi ro. Ripko mhɔ wok sɔvɔi nɔkwɔrhakwɔrha me mɔ tuhɔmri karen mane sɔ trasitu ia tata mine mama sɔvɔnraha kurirɔ. Mɔtɔ wok sɔvɔi tata mine mama irau tro iamɔnha irɔ rasitu ia nɔkwɔrhakwɔrha me sɔvɔnrɔu.

¹⁵ Ro pen rerik ramagien mɔ takuvei pehe pam narimnari me sɔiou m kimiahaha, nɔnɔ muvei pen mwi nimiruien sɔiou tukumiahaha. Nokeikeien sɔiou rasori tukumiahaha, mɔtɔ sɔkimiahaha rouihi a tukw iou. Noien nɔha rɔpwɔh natukwatukwien!

¹⁶ Kimiahaha hiɔukurɔn mɔ nipɔrhienien iou iapkɔres mhɔ mane m kimiahaha, mɔtɔ rosi kimiahaha nepwin hiamɔni mɔ iakinno noien ikou me, muvehi kimiahaha ia neikuɔien me rɔmwhen ia kwɔnkru.

¹⁷ Rɔfo? Iakakres m kimiahaha ia nɔrmama me nɔha iakinɔrhi pehe irɔha hɔuvehe tukumiahaha? Rekɔm!

¹⁸ Iakinɔres Taetas mɔ truvehe mɔtoni kimiahaha, nɔnɔ mɔrhi pehe piɔvtaha riti irau min. Mɔtɔ Taetas nɔha in ripkakres mhɔ m kimiahaha. Kimiahaha hiɔukurɔn mɔ kimrɔu min irauavɔn pɔri nɔtɔrigien

səkimrau mine noien kuatia.

¹⁹ Rosi rerimiahā rirhi mə ia nəgkiariien me pam nəha kimaha iahaməgkiari m kimiaha, mamhənise nəgkiariien ərəha me nepwɪn səməme kamɪni ia kimaha, mətə rekəm. Ia nəmri Kumwesən kimaha iahaməgkiari, mamhəni rəmwhen sə Kristo rokeikei. Nərmama keikei me, narimnari me pam səməme iahamo, mətə iahamo mə tahəuvrhəkin kimiaha hiəuvehe mhəutə.

²⁰ Iakani iamɪnhi irə ti nəri nə mə iakamhekɪr mə kamo nəpɪn takuvehe, takətoni mə hiopə, hiəpko mhə noien sə iakokeikei. Nənə kimiaha mwi tihətoni mə iakopə, iapko mhə noien sə hiokeikei. Iakamhekɪr mə takətoni kimiaha nepwɪn hiaməvisə, nepwɪn rerinraha ramrhi ərəha irəha me, nepwɪn niemaha raməpi irəha, nepwɪn kamhətərig əpa ti nirəha, nepwɪn kamhəni neikuəien mamhouraha nəghi iərmama irə, nepwɪn kamhəni nikare iərmama, nepwɪn kamhərpwi irəha, mamho əpnəpen noien me.

²¹ Iakamhekɪr mə kamo nəpɪn takuvehe mwi Kumwesən səiou ro iou iakauris ia nəmrimiaha. Nənə rerik trərkwəpɪr iakasək tukumiaha me nepwɪn səməme hənəmo noien ərəha fwe kupwən, nənə mhəpwəh nɪrərigien ia noien ərəha me səvənraha səməme kamho ia nəpɪn me. Irəha kamho noien me səməme həmkemik, irəha nərman mine nɪpran kamhəiri əpnəpen irəha me, mamho mwi noien ərəha nepwɪn mwi.

13

Nægkiariien sə Pol rani ti nəsuəpwirriien nakalasia me fwe Korin

¹ In i navəniien səiou səro kahar irə takuvehe mətoni kimiaha. Nəkukuə Ikinan rani mə, “Nəp̄in iərmama riti rarukwi pen nəgkiariien ia iərmama riti, iərmama kəru uə kahar tuhaməkeikei mhəni nəgkiariien kuatia, nənə nərmama tuhəukurən mə nəgkiariien nəha karukwi pen ia iərmama nəha ro n̄ipərhiēnien.”

² Iakokeikei mə tak̄ini nəgkiariien riti tukumiaha səməme fwe kupwən hiamo noien ərəha, iakokeikei mə tak̄ini mwi tukumiaha pam. Iakuvəni raka nəgkiariien i tukumiaha kupwən nəp̄in iak̄iməuvehe tukumiaha sə ro kəru irə, nənə təkwtək̄wuni iakamarə isipw̄in tukumiaha, mətə iakokeikei mə tak̄ini mwi. Tr̄ini m̄inuə iakuvehe mətoni mwi kimiaha, mətə kimiaha nepw̄in hiamo ihi noien ərəha, tako r̄iskai m̄inraha məkoui atukwatukw irəha irə.

³ Tako iam̄inhi irə ti nəri nə mə hiamətui nari riti sə tako trahatən pen mə n̄ipərhiēnien i Kristo raməgkiari ramier ia nəgkiariien səiou. Nəfe Kristo ramo m̄ kimiaha r̄ipkəpou mhə tukwe, mətə in ramo kamətə n̄iskaiien səvənhi ia kimiaha.

⁴ N̄ipərhiēnien, nəp̄in k̄inərui tərini pen in ia nei kamarkuau, n̄iskaiien səvənhi riwən. Mətə ipwet m̄ine in ram̄iru ia n̄iskaiien səvəi Kumwesən. Kimaha n̄iskaiien sək̄imaha riwən rəmwhen mwi ia Kristo fwe kupwən. Mətə nəp̄in tahəuvehe mhətoni kimiaha, tihətoni mə k̄imaha iahaməm̄iru ia n̄iskaiien səvəi Kumwesən rəmwhen a ia Kristo ipwet m̄ine.

⁵ Ramasan mə kımiaha atukw tihətə amasan kımiaha me, mhəkiri noien səkımiaha, mhətə sas mə hiaməkwtəmhiri pərhiēn noien səvəi nahatətəien uə rekəm. Tihaməkeikei mhəukurən mə İesu Kristo in fwe ia rerımiaha, mətə mə nahatətəien səkımiaha ro neikuəien i, Kristo in riwən fwe ia rerımiaha.

⁶ Nənə rerik ramrhi mə tihətə sas ia kımaha mə nahatətəien səkımaha rıpkə mhə neikuəien i.

⁷ Mətə kımaha iahaməfwaki m Kumwesən mə kımiaha riti rıpkə mhə nari riti rərəha. Kımaha iahəpkəfwaki mhə iamınhi irə mə tuko kəgnəgini kımaha mə wok səkımaha ramasan, rekəm. Mətə iahokeikei mə kımiaha tiho noien sə ratukwatukw nəri auər a mə ia nətəien səvəi nərmama nepwın həni mə wok səkımaha rərəha.

⁸ Ro iamınhi irə ti nəri nə mə ko iahəpkə mhə nari riti sə rəsisəg nıpərhiēnien, mətə iahəukurən a noien nəri sə rauvehi utə nıpərhiēnien.

⁹ Nəri auər a mə kamətə kımaha mə nıskaiien səkımaha riwən, mətə mə kımiaha hiəskai rerımaha ragien. Ro iamınhi irə iahaməfwaki mə tihəuvehe matukwatukw amasan.

¹⁰ İakamarə isipwın tukumiaha mırαι nəkukuə i mərhi pehe i tukumiaha. İako iamınha irə mə nəpın takuvehe tapkə mhə rıskai m kımiaha. İou aposol riti, Kumwesən ruvei pehe nasoriien nəha miou mə takuvrhəkin kımiaha hiəuvehe mhəutə, mətə in rıpkuvei pehe nasoriien nəha miou mə takouraha kımiaha hiəwaiu.

Nəgkiariien sampam

¹¹ Piak me, in i nægkiariien sampam səiou iakini məsəkir m kımiaha. Kımiaha tihaməkeikei mheipeni suatuk me səkımiaha, mhəregi nægkiariien səiou, mho nətərigien səkımiaha pwəh ruvehe mo kuatia, mharə ia nəmərinuien, nənə Kumwesən səvəi nokeikeiien mine nəmərinuien tramarə tukumiaha.

¹² Həni ramasan tukumiaha me mhakei m kımiaha me ia nakeiien sə rəmher.

¹³ Nərmama me pam səvəi Kumwesən kamhəni pehe ramasan tukumiaha.

¹⁴ Pwəh namasanien səvəi Iesu Kristo Iərimənu səkitaha mine nokeikeiien səvəi Kumwesən mine no pəriien nari səvəi Nənimwın Ikinan tramarə tukumiaha pam.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416